

LA CATEDRÂL DE CULTURE

E je nassude tune ete, chê di Mieç che si à cjàpât il vizi di clamâle oscurantiste. Par dî che nol esist un timp dut sflandorôs o dut neri come il farc, ma ogni ete e à lis sôs lûs e i siei scûrs e, come simpri, al dipent dal om dâi une conotazion positive o negative al so timp. Le clamavin "studium generale" o "universitas studio rum", che po al à dât il non a cheste istituzion. Il tiermin "generale" e il tiermin "universitas" si riferissin, plui che al contignût dal studi, al ategjament mentâl e spirtuâl dai docents e dai students, i "clerici", che a vevin di vê une vision gjenerâl e armoniche de realtât, tune scansion gjerarchiche ben definide, come che ben definide e jere la scansion sociâl, cu lis fassis sociâls une sot o sore di chê altre. Come che te gjerarchie civîl in teste al jere l'imperadôr o il re, cussì te gjerarchie culturâl il baston dal comant lu veve la teologjie, cun dutis lis disciplinis, a tacâ de filosofie, sotoponudis come massâriis a une parone severe. L'universitât e je nassude, come tantis altris iniziativis, tal grim de glesie. Che dopo la glesie le vedi tignude sot des cotulis, par controlâle e no lassâle cressi in autonomie, al è un altri discors. In chê volte, il cûr de citât e de societât e jere la catedrâl, cu lis sôs toratis e rosons e vereadis gotichis. Dut al puartave li e dut al partive di li. Par solit l'universitât e jere te stesse place o subit dongje. Po i tims a son gambiâts e ribaltâts e l'om al à cuistade la sô juste autonomie, dal moment che ancje la creazion e ven fûr des mans di Diu e che la reson no je mancul impuartante e preziose de rivelazion o fede. Lis universitâts si son multiplicadis, diviersificadis, specializadis e la lôr funzion providenziâl nissun nol po' metile in dubit. Che di fat ducj i regims, e sore dut lis ditaturis, a son disponûts a molâ dut, ma no il control su l'universitât, che e à di sfornâ l'"intelighentsia" e la classe dirigjent. Pa la cual lis palanchis dopradis pa l'universitât, e pa lis scuelis che lis precedin e preparin, a son simpri pôcs e i plui ben spindûts. Se la catedrâl e je la braure dai cristians di un teritori, l'universitât e je la catedrâl de culture, la braure dai citadins. Un popul cence universitât al riscje une eterne sotanance, parcè che al pò doprâ i braçs ma no il cjâf. Al scugnarâ lâ a inscuclâsi fûr de sô patrie e no je propit la stesse robe cressi tun'aghe culturâl nostrane e tun'aghe foreste.

Par chel ogni popul al brame di vê un istitût superiôr come condizion par saltâ fûr de manovalance e de sotanance. Centenârs di miârs di furlans a àn scugnût emigrâ par vuadagnâsi la bocjade. Cun sudôrs e sanc a àn cirût, come ducj, di dâur ai fîs une istruzion e un toc di cjarte che ju metès a pâr di chei altris, ma ancje lôr a àn scugnût emigrâ in citâts e scuelis forestis. Chest sium di un popul, cussì sacrosant, cussì meretori e meretât, pe insensibilitât dai politics e pe invidie dai confinants, nol à cjatât udience di nissune bande.

Al à scugnût capitâ un taramot come chel dal 1976 par viodisi ricognossût un dirit. Le vin domandade framieç des maseriis e de tribulazion plui fonde. Par podê tornâ a jevâ in pîts.

E restarà te storie la straordinarie osservazion di pre Checo Placerean: «Intant dal taramot, i muarts ju tiravin fûr pai pîts e i vîfs pal cjâf. Nô o volìn saltâ fûr di cheste calamitât cul cjâf». Ve il parcè de universitât furlane o dal Friûl ribatiade o ridimensionade in univesitât di Udin. E je l'uniche nassude cul intent specific di rinovâ i filons tradizionâi de culture, de storie e des tradizions dal Friûl. Nassude par nudrî l'anime dal nestri popul, supant il miôr dal so patrimoni culturâl par fâlu diventâ un nutriment sostanziôs pal Friûl di vuê e di doman. Parcè che l'universitât no va valutade a stagjons o a anadis, ma e domande tims luncs, inviestiments e programazions culturâls che si viodarà il risultât magari fra un secul.

E à di partî di un passât lontan ma nestri e puartânus a un avignî lontan, simpri nestri. Par fâ dut chest e à di vê il sintiment di puartâ a nivel di cussience e di studi il patrimoni unic di chest popul e di rielaborâlu, innovâlu, rinovâlu, cun sapience, creativitât, rispjet e libertât. Une universitât peade al teritori tal cjapâ sù e tal tornâ, tune sinergjie sistematiche. Une ricercje che no lasse fûr nissun setôr de societât furlane, come che il cûr e il çurviel a mandin sanc e impuls a dut il cuarp, pene la necrosi. No mi permetarai mai di insegnâur a di chei che a spindin la lôr inteligjence e la lôr vite in chest templi de culture. A son int cussiente e competente, sore dut a àn capît la funzion propulsive di cheste istituzion tal contest storic e gjeografic dal Friûl, fasint puint fra passât e avignî, fra il Friûl e lis regjons confinantis de Carintie e de Slovenie, fra l'Europe dal ovest e chê dal est. Fâur cognossi il Friûl ai furlans. Fâ cognossi il Friûl a altris realtâts. Fâ cognossi altris realtâts al Friûl. Tal contest de famee dai popui de Europe e de globalizazion, che ti oblee a confrontâti sistematicamentri fra locâl e mondiâl, fra l'atenzion amorse al to teritori e l'atenzion curiose al mont intîr. La preparazion e la disponibilîtât dal personâl de universitât, a partî dal retôr Furio Honsell e dai predecessôrs Marzi di Strassolt e Franco Frilli, e je plui che evident e consolant. Il materiâl uman al è bon, come che a dimostrin i judizis che a vegnin dâts sui nestris students, su la cualitât alte dai studis, su la buine preparazion tes scuelis superiôrs. O vin ducj i numars par podê sperâ che il Friûl al cjati te sô universitât un pont di riferiment pe culture umanistiche e imprenditoriâl, pe ricercje sui valôrs dal passât e su lis pussibilitâts tecnologjichis dal avignî. Cualchidun al fevele de universitât come di une fabriche. Mi plasarès plui fevelâ di une farie, di un artesanât de culture, che e rive a fâ ce che a fasin i faris: cjapâ la materie informe, scjaldâle fint a fâle diventâ luminose e trasformâle in autenticis creazions di art. E je l'uniche maniere serie di onorâ chei che a son restâts sot des maseriis, chei che le àn profetade e volude, chei che le stan puartant indenant e chei che a spietin de universitât dal Friûl une sperance fondade di progrès armonic e global de nestre tiere.